

## ALAHADY 1 Fiavian'ny TOMPO - TAONA A



***"Koa aoka àry ho vonona koa ianareo, fa ho avy amin'ny ora tsy ampoizinareo ny Zanak'olona"***

Ry kristianina havana, avy nankalaza ny famaranana ny taona jobily taona masina manokana ny famindrampo isika ka mbola mitamberina ao antsaintsika ireny fankalazana maro natao nankalazana an'izany ary miaraka misaotra an'Andriamanitra isika amin'ny fahasoavana rehetra noraisintika. Ny fankalazana no mifarana fa ny fiainana azy dia manomboka amin'izao araka ny torolàlana nosoritana amintsika ireny dia ny asa fito isaky ny sokajiny avy : ny asa ara-nofo sy ny asa arapanahy. Mbola nampian'ny Papa Ray masina anankiray rahateo ny asa hanohizana an'izany taona ny famindrampo izany dia ny fikolokoloana ny tontolo iainana ary ho atsika eto amin'ny diosezy dia tafiditra amin'ny asa pastoraly satria ny tanjona ho antsika dia ny ho diosezy maitso, loko izay manambara fanantenana rahateo ka mamporisika atsika hiroso amin'ny lalindalina kokoa amin'ny fampitraofana ny finoana sy ny finoana andavanandro. Voalazantsika koa fa izao taona izao dia irintsika mba ho hisy fo vaovao manentana isika rehetra araka ny sokajy rehetra : eo amin'ny fianakaviana eglizy kely, ny eglizy fiombonana, ny eglizy fototra, eglizy iraka, ny diosezy manontolo.

Ho fo mitepo fitiavana an'i Kristy, mba ho fon'Andriamanitra tokoa isika ka fo mitondra fihavanana sy feno fitiavana no manjaka amin'ny tànanantsika tsirairay sy eto amin'ny foiben'ny diosezy eto Antsiranana : ho mason'Andriamanitra ny fomba fijerintsika amin'ny manodidina atsika sy ny fon'Andriamanitra ny fifandraisantsika amin'izy ireo amin'izay dia ho lavitra ny fanaratsiana, ny hetraketraka sy ny ratsy rehetra.

*Vakiteny I : lz. 2, 1-5*

*Salamo : Sal. 121*

*Vakiteny II : Rôm. 13, 11-14*

*Evanielv : Mt 24 37-44*

Fanahin'Andriamanitra no irintsika hanentana atsika hihaina ao anatin'ny fahamarinana ka ho lavitra atsika ny risoriso sy ny fitapitaka mba hianaintsika ao anatin'ny fiadanana.

Ho t`anan'Andriamanitra no hifandraisantsika amin'izay dia t`anana hamitram-pihavanana ka hanjaka amintsika tsirairay ato amin'ny diosezy ny tena fiadanana sy fihavanana marina tokoa.

Ho vavan'Andriamanitra ny vavantsika mba tsy hanaratsy olona isika fa hanatsara sy hikatsaka mandrakariva ny soa iombonana no hanana vava entina hidera sy hanome voninahitra an'Andriamanitra.

Amin'izao dia hanomboka ny taona litorjika vaovao isika, rehefa vaovao ny taona dia mifampiarahaba no atao. Koa faly miarahaba isika tsirairay avy amin'izao Alahady voalohany Fiaviana.

Taona vaovao izay ho entintsika handalinantsika ny finoantsika ho taonan'ny FINOANA, taona marim-pototra, ho latsapaka ao amintsika ny finoana amin'izay hahay hampitraotra ny finoana sy ny fiainana andavanandro isika.

Ny tenin'Andriamanitra androany dia misarika ny saintsika amin'ny fiaviana sy fahatongavan'ny Tompo. Fantantsika ry Kristianina havana fa efa tonga teto anivontsika tokoa ny Tompo efa roa arivo taona lasa, izy tonga nofo ary io no ankalazaintsika amin'ny famindrampon'Andriamanitra dia tsy iza fa i Kristy izy ilay endrik'Andriamanitra. Norahin'Andriamanitra izy hanambara fa tsy lavitra an'Andriamanitra isika, ilay Andriamanitra Trinité, tiany hiombona aminy isika ary izay no ankalazaintsika amin'ny Noely. Ny fankalazana ataontsika tsy hoe mahatsiaro, na hoe "anniversaire" ny Noely fa fankalazana izay midika sady mahatsiaro isika no mivelona.

Ilaina ny fahatsiarovana satria mamelombelona fa ny tena zava-dehibe dia ny mivelona sy miaina an'izany fa eto anivontsika tokoa ny Tompo.

Noho izy tonga nofo dia ao ampontsika tsirairay avy i Kristy, ao amin'ny Eglizy ka hivelomantsika fa indrindra amin'ny alalan'ny sakramenta sy ny tenin'Andriamanitra ary ny fiainantsika dia tonga eo anivontsika tokoa ny Tompo.

Ny fahatongavana izay efa santarintsika dia ny fiverenany amim-boninahitra izay andrasantsika, ny fiavian'i Kristy amin'ny fomba manetriketrika ka hanehoany ny maha mpanjaka sy Andriamanitra mahefa ny zavatra rehetra azy. Tsara ampatsiahivina izany amin'izao fanombohana ny taona vaovao litorjika izao ka handalianntsika ny finonantsika.

### **Azo fintinina tahaka izao ny fampianarana tian'ny Eglizy omena atsika amin'izao Alahady voalohany Fiaviana izao :**

- **Asain' Andriamanitra miambina tokoa isika**, tsy hoe ankatahorana satria tsy Andriamanitra lavitra izy fa Andriamanitra manakaiky atsika no be famindrampo, izay no efa nambaran'i Kristy izay eo anivontsika mandrakariva ka ankafaliana no andraisantsika azy.

- **Asain'Andriamantira hifaly isika**, tsy hoe hafaliana hita avy ety ivelany fotsiny fa hafaliana ao anatin'ny fo vokatry ny fiadanana izay entin'i Kristy eto anivontsika satria izay no dikany nahatongavan'i Kristy eto anivontsika, izy Emanoela, izay no Noely ankalazaintsika dia i Kristy Fiadanana sy tena fitiavana.

Mampianatra atsika ny tena fitiavana sy tena maha-olona atsika i Kristy ary noharian'Andriamanita hitovy endrika aminy isika ary ny endrik'Andriamanitra dia ny fitiavana, izany no anjaram-piainantsika, io no mahatonga atsika miandry ankafaliana ny fiavian'ny Tompo.

- **Asain'Andriamanitra ho feno fanantenana isika** tsy hoe ho kivy isika satria lavitra Andriamanitra ary ao anaty fahasahiranana isika ary aza manonofy isika fa raha mivelona ny finoana isika fa indrindra amin'izao taonan'ny finoana dia hitondra fanantenana be satria hiova ny fifandraisantsika amin'Andriamanitra ary eo anivontsika izy. Rehefa eo anivontsika izy dia miova ny fifandraisantsika samy olombelona sy ny amin'ny tontolo iainantsika ka feno fanantenana isika.

Efa voalazantsika rahateo fa ho diosezy maitso ny diosezintsika. Maitso midika fanantenana ka hitondra hery vaovao sy aim-baovao ho atsika satria raha voakolokolo tsara dia mitondra an'izany fanantenana izany.

**Famintinana ireo ezaka hianantsika ireo dia ilàna fibebahana. Izao fiavian'ny tompo izao dia vanim-potoana hanasana atsika hibebaka, hanavao ny fontsika izay hanasana atsika hanohy ny fiaiana ny taona masina famindrampom'Andriamanitra anatin'ny taonan'ny Finoana.**

Manambara rahateo ireo vakiteny telo androany ny iainantsika mandritra ny herinandro voalohany Fiaviana izao : Hibebaka isika hiandry ankafaliana ka hiomana amin'izany araka ny voalazan'i Jesoa ao amin'ny evanjely *“Koa miambena àry, fa tsy fantatrareo izay tapak'andro hiavian'ny Tomponareo”*. Na dia tsy fantantsika aza ny ora, ny fotoana dia hiezaka isika ankafaliana hanomana ny fo amampahintsika amin'ny alalan'ny fibebahana tahaka ny voalazan'i Md Paoly amin'ny vakiteny faharoa : *“ Izao tokoa ny vanim-potoana tsara indrindra ary efa akaiky ny famonjena atsika”*

Aoka ary isika mba ho fo feno finoana ka ho vonona hibebaka ka hanavao ny fiainantsika.

Ny vakiteny voalohany bokin'izaia mpaminany dia nanambara fa ho feno fanantenana isika raha tonga tokoa ny fotoana dia hanangona atsika rehetra izy dia hiadana isika amin'izay.

**Ry Kristianina havana hararaoty izao fotoana izao mba hivelomantsika bebe kokoa amin'ny maha-Kristianina atsika sady izany rahateo ny fiomanana ho atsika ka hizara ny fananteanana isika. Raha eo amintsika ny fanantenana, tsy hoe fanantenana manonofy izany fa mila mivahatra amin'ny fiainantsika andavanandro araka ny efa voalazantsika matetika ny mahay mampitraotra ny finoana sy ny fiainana andavanandro.**

Ry Jesoa Kristy Tompo ô, manasa anay miomana amin'ny fiavianao ianao izay tsy lavitra fa eo anivonay. Nilaza ianao mba hiambina izahay ao anatin'ny hafaliana sy fanantenana, ka enga anie ny fiainanay manontolo hanambara fa ianao tokoa no manazava anay ka tsy ho hisy hahatahotra anay. Ho tonga ianao ka hahay handray anao anie izahay amin'ny fiainanay, amin'ny eritreritray, amin'ny adidy ataonay rehetra, handray an-tànana ny Eglizy tokoa anie izahay dia ho vavolombelonao eo amin'ny fiainanay, ho fanasina sy fahazavana amin'ireo manodidina anay fa indrindra ho an'ireo izay mbola tsy mahalala anao. Amen